

1001 Masalah

Abu Al-Mukhtar Sedia Menjawab



Wang Loteri Kebajikan Untuk Masjid

Tuan, terbit daripada fatwa Mufti Johor, Syed

Alwi bin Tahir al-Haddad, maka banyak masjid-masjid telah dibina daripada wang hasil loteri masyarakat, sama ada semuanya daripada wang itu atau pun sebahagiannya. Jika sekiranya wang itu haram maka bagaimakah kedudukan masjid-masjid itu? Adakah boleh dijadikan tempat sembahyang ataupun dirobohkan sahaja?

Muhammad bin Ahmad, Sabak Bernam, Perak.

Jawab: Kita berpendapat ada moleknya persoalan ini dikupas dengan luas supaya orang-orang berfikir dengan halus dalam soalan ini sebab telah tidak dapat disembunyikan lagi bahawa masjid-masjid telah banyak dibina daripada wang **hasil loteri kebajikan**.

Apabila sahaja disebut masjid, maka terbayang di hadapan mata kita sebuah bangunan tempat ibadah yang indah yang di dalamnya dimasukkan ukiran-ukiran dan arca-arca yang menarik sehingga dengan sekali pandang sahaja terlihatlah itu masjid. Apabila disebut surau, maka terlihatlah kepada kita tempat ibadah yang kecil yang banyak berserak merata-rata tempat di seluruh tanah air kita ini. Dengan pengertian ini maka di masjid itulah sahaja yang dibolehkan melakukan sembahyang Jumaat, sedang di surau-surau tidak digunakan kerana sembahyang Jumaat – di sana hanya dilakukan untuk sembahyang berjemaah menunaikan sembahyang fardu sahaja.

Adapun masjid yang dibina pada zaman Nabi adalah keadaannya sangat sederhana. Nabi dan sahabat-sahabatnya tidak mau menghiasi zahir sesuatu, tetapi baginda Rasulullah

dengan sahabat-sahabatnya menumpukan usaha mereka menghiasi kebatinan orang ramai dan membersihkan diri daripada pengaruh syaitan. Hal ini tentulah menjadikan mereka menghiasi zahir yang sangat kurang.

Banyak ahli-ahli sejarah yang sepakat mengatakan bahawa masjid Nabi yang dibina beliau di Quba' dan di Madinah adalah sangat-sangat sederhana benar. Sungguh pun begitu adalah mencukupi syarat-syarat bagi sebuah masjid. Masjid itu dibuat ialah suatu ruangan empat persegi, kelilingnya berdinding. Tingginya lebih tinggi sedikit daripada setinggi orang dan tiangnya dibuat daripada pohon kurma. Di atas dibuat datar yang dibuat daripada daun kurma dan tanah liat. Lantainya adalah sederhana benar – daripada tanah sahaja. Setelah kena air hujan baharulah diberi batu, tetapi dengan batu-batu kerikil yang biasa. Sebahagian daripada masjid itu disediakan untuk fakir miskin yang bergelar *ahlu al-suffah* iaitu orang-orang yang sengaja menyediakan dirinya untuk mempelajari (menghafaz) al-Qur'an dan lain-lain keperluan agama. Mereka adalah sentiasa bersedia untuk mendakwahkan agama atau mengajar ke mana-mana yang dikehendaki dan sentiasa bersedia pula untuk disuruh berperang bersama dengan saudaranya kaum muslimin. Pada setengah tempat masjid itu tidak beratap dan di sana ada sebuah perigi bagi tempat berwudu'.

Inilah asas masjid itu. Menurut Kiyai Zainul Arifin 'Abbas dalam bukunya "*Muhammad*" mengatakan bahawa itulah asasnya sedang agama tidak menentukan bentuk sesuatu bangunan kerana yang demikian itu adalah mengenai hal-hal keduniaan.

Masjid Pembawa Pesona

Kemudian yang mustahaknya dalam membina masjid itu ialah binaan masjid itu hendaklah didasarkan kepada taqwa (kebaktian). Masjid-masjid yang dibina di atas dasar yang tidak bakti adalah dilaknat Tuhan dan diperintahkan oleh Rasulullah supaya dirobohkan sebagaimana suatu binaan masjid yang dibuat oleh orang-orang munafik pada zaman Nabi, di mana mereka

menjadikan masjid itu tempat mereka berkumpul untuk membuat sesuatu yang akan merosakkan kedudukan Islam.

Masjid yang tersebut ini terkenal dengan nama “masjid *durār*” (masjid yang berbahaya).

Peristiwa Masjid “*durār*”

Di dalam zaman Nabi ada segolongan kaum munafik telah mendirikan sebuah masjid dengan tujuan untuk membahayakan umat Islam. Masjid ini terkenal dengan nama “masjid *durār*” (masjid yang berbahaya)

Di dalam al-Qur’ān al-Karīm (Surah al-Tawbah, ayat-ayat 107 hingga 110), Tuhan telah menerangkan perihal orang-orang yang mendirikan masjid itu dan tujuan mereka yang tidak jujur, seperti berikut:

Wa alladhīna attakhadhdū masjidan qīrān wa kufran wa tafrīqā baina al-mu'minīna wa irshādan liman hārabā Allāha wa Rasūluhū min qablu, wa layaḥlifunna in aradnā illā al-ḥusnā, wallāhu yashhadu innahum lākādhibūn.

Ertinya: “ dan mereka yang mendirikan masjid untuk membahayakan kerana kufur mereka, dan untuk membahayakan orang-orang yang beriman, dan sebagai tempat intipan bagi kepentingan orang yang telah memerangi Allah dan Rasul-Nya dahulu, tetapi mereka akan bersumpah: “Tidaklah kami kehendaki (dengan membina masjid ini) melainkan untuk kebaikan jua.” Pada hal Allah saksikan bahawa sesungguhnya mereka itu, orang-orang yang berdusta.” (107, surah al-Tawbah).

Oleh kerana golongan munafik mendirikan masjid itu dengan niat yang tidak jujur dan membahayakan umat Islam sebagaimana yang tersebut di dalam ayat suci tadi maka Tuhan melarang Rasulullah supaya jangan sembahyang di masjid “*durār*” itu (kerana mereka telah meminta supaya Nabi sembahyang di dalamnya). Larangan Tuhan dijelaskan dalam ayat 108, surah al-Tawbah:

Lā taqum fīhi abadan lamaṣjidun ussisa 'alā at-taqwā min awwali yawmin aḥaqqu an taqūma fīhi, fīhi rijālun yuhibbūna an yataqahharū, wallāhu yuḥibbu al-mutaqahhirīn.

Ertinya: Janganlah engkau sembahyang di dalamnya selama-lamanya kerana masjid (engkau) yang didirikan atas (dasar) taqwa dari hari yang pertama (didirikan), lebih patut engkau sembahyang di dalamnya, di dalamnya ada beberapa orang lelaki yang suka supaya mereka jadi bersih; dan Allāh suka kepada orang-orang yang bersih.”

Menurut huraian al-Ṭabarī bahawa masjid yang telah didirikan atas dasar taqwa sebagaimana yang tersebut dalam ayat ini ada dua pendapat ahli tafsir, sebahagian mengatakan masjid itu ialah masjid yang mula-mula didirikan oleh Nabi di Quba’. Manakala bahagian yang lain, dan inilah pendapat yang telah dipilih oleh al-Ṭabarī, bahawa masjid itu ialah masjid Rasulullah di Madinah yang mengandungi maqamnya (kuburnya).

Kemudian Tuhan bertanya, manakah yang lebih baik antara dua jenis masjid (Masjid Nabi atau masjid *durār*) itu? Firman-Nya:

Afaman assasa bunyānahu 'alā taqwā mina Allāhi wa riḍwāni khairun am man assasa bunyānahu 'alā shafā jurufin hārin fanhāra bihi fī nāri jahannam, wallāhu lā yahdī al-qawma al-zālimīn.

Ertinya: “Adakah orang yang mendirikan binaannya (masjidnya) di atas (dasar) taqwa kepada Allah dan (kerana) keredaan itu lebih baik, ataukah orang yang mendirikan binaannya (masjidnya) atas tepi jurang yang (dalam dan hendak) runtuh, lalu (bangunan itu) membawanya jatuh ke dalam api neraka? Allah tidak akan memberi pertunjuk kepada orang-orang yang zalim.”

Jelasnya, Allah *Subḥānahu wa Ta'ālā* bertanya: Orang manakah yang lebih baik? Adakah mereka yang membina masjid-masjid mereka di atas dasar taqwa kepada Allah dan keredaan-Nya ataukah mereka yang mendirikan masjid-masjid mereka dengan berdasarkan perbuatan yang melanggar perintah-Nya dan tidak direhái-Nya, sehingga menjadikan masjid-masjid yang mereka dirikan itu seolah-olah terletak di tepi jurang yang dalam lalu runtuh membawa mereka ke dalam api neraka jahanam? Kemudian Tuhan menerangkan lagi,

bahawa mereka yang demikian, ialah orang-orang yang zalim, dan Allah tidak akan memberi pertunjuk kepada golongan yang zalim.

Dalam ayat yang ke 110 pula diterangkan akibat golongan yang zalim itu, yang telah mendirikan masjid mereka bukan di atas dasar taqwa tetapi sebaliknya berdasarkan “*durār*” (perbuatan maksiat yang membahayakan), firman-Nya:

La yazālu būnīyānu humu alladhihī banaw rībatin fī qulūbihim illā an taqāṭa‘a qulūbu hum, wallāhu ‘alīmun ḥakīm.

Ertinya: Sentiasa masjid yang mereka dirikan (dengan cara yang tidak direndai oleh Allah) itu menjadi syak (ragu-ragu) di dalam hati mereka kecuali (apabila) hati mereka hancur (lalu mereka mati dan dengan itu baharulah selesai keraguan mereka). Allah Amat Mengetahui lagi Bijaksana.”

Menurut penjelasan al-Tabarī: “masjid *durār*” itu akhirnya, dengan perintah Rasulullah *sallā Allāh ‘alayhi wa sallam* telah dibakar dan diruntuhkan oleh orang-orang Islam, setelah Allāh ‘Azzā wa Jalla menurunkan ayat-ayat suci yang tersebut, menguji orang-orang munafik yang mendirikannya dan melarang Nabi daripada sembahyang di dalamnya.

Haramnya Loteri:

Biarlah hulu kita tinggalkan tentang kedudukan masjid yang tersebut di atas. Sekarang marilah kita perhatikan tentang haramnya loteri itu. Haramnya loteri itu tidak ada syaknya kerana ia termaktub di dalam al-Qur'an surah al-Mā''idah ayat 90¹ yang berbunyi:

yāayūhā alladhihīna āmanū innanā al-khanūru wa al-maisiru wa al-anṣābu wa al-azlāmu rijsun min ‘amali al-shaitānu fa ’jtanibūhu la ‘allakum tuflīḥūn.

Ertinya: “Hai orang-orang yang beriman! bahwasanya arak, *maysir*, *anṣāb* dan *azlām* itu tidak lain melainkan perkara kotor daripada perbuatan syaitan; oleh itu hendaklah kamu jauhi dia supaya kamu dapat kejayaan.”

Di sini marilah kita mengupas hanya dalam perkara

maysir sahaja. *maysir* ertinya, judi atau loteri. Sifat *maysir* yang ada pada zaman jahiliah yang menjadi sebab ayat itu turun menegahnya adalah diriwayatkan demikian:

Orang-orang zaman itu mengadakan sepuluh undi. Namanya: 1. *al-fadh*, 2. *at-tau'am*, 3. *al-raqīb*, 4. *al-halis*, 5. *al-nāfis*, 6. *al-musbil*, 7. *al-mu'allī*, 8. *al-manīh*, 9. *al-safīh* dan 10. *al-waghid*.

Di antara sepuluh itu, tiga penghabisan yang tidak mendapat hadiah.

Mereka potong seekor unta dan mereka bahagikan kepada 28 bahagian lalu mereka pecah-pecahan.

Satu bahagian untuk *al-fadh*

Dua bahagian *at-tau'am*

Tiga bahagian untuk *al-raqīb*

Empat bahagian untuk *al-halis*

Lima bahagian untuk *al-nāfis*

Enam bahagian untuk *al-musbil*

Tujuh bahagian untuk *al-mu'allī*.

Selain daripada tujuh ini mendapat kosong. Sepuluh orang yang bermain loteri ini berkumpul. Mereka masukkan sepuluh undi tadi dalam satu pundi-pundi dari kulit atau lainnya, lalu mereka serahkan di tangan seorang yang adil. Orang yang adil itu menggongcang pundi-pundi tadi lalu dikeluarkan satu-satu lot itu kepada satu-satu orang sehingga habis sepuluh orang itu sekali. Orang-orang yang menang boleh mengambil daging unta yang disediakan mengikut susunan di atas dan orang yang menerima kosong hendaklah membayar harga unta yang disebelihnya itu.

Menurut kebiasaan mereka, daging-daging itu tidak boleh sekali-kali dimakan oleh orang yang menang tadi – semuanya hendak disedekahkan kepada orang-orang miskin.

Inilah keadaan loteri zaman jahiliah itu yang menjadi sebab turunnya ayat Tuhan yang tersebut. Di sini dapat kita memperbandingkan bagaimana loteri yang berjalan di negeri kita ini, yang diakui dengan rasmi bahawa

¹ Dalam Qalam ditulis sebagai ayat 9

agama Islam ialah agama rasmi Persekutuan Tanah Melayu.

Masjid di Tanah Air Kita

Di tanah air kita telah cukup banyak masjid yang ada.

Tetapi walaupun begitu masih banyak kegiatan umat Islam untuk mendirikan masjid. Setelah mendapat kepayahan meminta derma dan ada pula fatwa mengatakan wang hasil loteri yang disepakati haramnya itu boleh menjadi halal kerana putus hak milik dan lain-lain, alasan-alasan yang dibawakan maka timbulah permintaan-permintan kepada Lembaga Loteri Kebajikan Masyarakat wang untuk membina masjid di kampung masing-masing. Setengah-setengahnya kerana kekurangan dan setengah-setengahnya meminta lebih. Keadaan ini membawa pertelingkahan di kampung-kampung kerana sebahagian orang tidak mau mereka sembahyang di masjid yang ada wang yang haram untuk membinanya.

Mereka yang akhir ini berpendapat bahawa telah terang dan jelas bahawa loteri itu disengajakan sedang kalau putus milik atas wang-wang yang dipungut daripada loteri itu tentulah boleh dipakai, sedang loteri yang ada sekarang terus-menerus berkepanjangan. Permintaan dihadapkan kepada Lembaga Loteri ertinya wang yang diminta itu terang daripada wang hasil loteri yang terang haramnya itu.

Sebahagiannya ada pula berpendapat bahawa kerana loteri itu dipaksakan untuk terus-menerus dijalankan dengan kuat kuasa undang-undang, maka apakah kita akan membiarkan sahaja wang itu digunakan kerana maslahat-maslahat orang lain yang harus akan menjadi sebab untuk meruntuhkan kedudukan kita. Apakah kita tidak mau mengambil hasilnya untuk perkara-perkara kebajikan orang-orang kita sendiri.

Ada orang yang menyetujui syor yang akhir ini, iaitu wang-wang itu hendaklah kita ambil sekalipun kita ketahui haramnya, tetapi jika dibiarkan tentulah akan digunakan oleh lain-lain agama yang dengan sendiri tentunya akan menikam kedudukan Islam. Kerana itu mereka tidak keberatan sekiranya wang loteri itu diambil digunakan

kerana madrasah atau sekolah-sekolah ataupun mendirikan rumah anak-anak yatim atau seumpamanya, tetapi mereka membantah dengan keras sekiranya wang itu digunakan untuk masjid. Mereka berpendapat masjid itu hendaklah diasaskan dengan taqwa kalau wang daripada hasil loteri, di manakah taqwa itu?

Mereka menguatkan lagi bahawa wang-wang yang putus milik yang dipulangkan kepada *bayt al-māl* ataupun tanah-tanah yang dirampas, menurut hukum *feqah*, tidak boleh digunakan kerana masjid dan masjid tidak boleh dibina atas tanah rampasan itu atau di atas tanah-tanah yang tidak ada ketentuan tuannya. Mereka memandang bahawa tidak sewajarnya tempat beribadah, tempat menyembah Tuhan terletak di dalamnya suatu binaan wang *shubhah* apalagi kalau wang yang haram. Sedang orang-orang jahiliah pada zaman Nabi berusia 35 tahun, tatkala hendak membina Ka'bah mereka menghendaki tidak ada seorang pun yang menderma kerana membinanya daripada wang yang ada *shubhah* barang sedikit pun. Kalau orang jahiliah begitu, betapa pula kita?

Bagaimana keadaan-keadaan masjid yang sudah di bina?

Sekarang dapatlah kita membawa pembaca-pembaca kepada suatu kesimpulan. Kami berpendapat sama ada wang loteri itu disebutkan menjadi halal kerana putus hak milik apalagi wang loteri itu haram maka wang itu tidak boleh dibuat atau dijadikan masjid. Di dalam ayat-ayat yang dibawa terang telah menunjukkan bahawa masjid yang dibina itu hendaklah dibina dengan taqwa. Adakah daripada wang yang sekurang-kurangnya ada *shubhah* di dalamnya itu, boleh dikatakan suatu taqwa? Adakah umpamanya Masjid Jamek yang akan dibina di Kuala Lumpur yang sebahagian daripada belanja membinanya diadakan khas wang loteri kerana binaannya itu satu taqwa atau satu muslihat siasah?

Kalau muslihat siasah, bukan taqwa, maka dapatlah disebut masjid-masjid yang serupa itu atau seumpamanya masjid yang sama dengan masjid *durār* dan Tuhan melarang sembahyang di dalamnya. Masjid yang serupa itu hendaklah diruntuhkan

dan tidak menjadi sesuatu kesalahan bagi seseorang meninggalkan sembahyang di dalamnya sekiranya masjid itu tidak diruntuhkan.

Kita mesti memandang adakah patut kita membina sebuah masjid daripada wang yang tidak tentu kedudukannya (sekurang-kurangnya) padahal di dalamnya kita akan melakukan ibadah kepada Allah?

Terang dan nyata bahawa masjid yang dibina dengan wang yang diberi oleh Lembaga Loteri Kebajikan itu telah menimbulkan XXX (perpecahan) di antara umat Islam yang sifatnya membawa bencana. Maka kerana itu, menurut pendapat kita, keadaannya tidak salah seperti masjid *durār* pada zaman Nabi dan kerana itu wajib masjid yang seperti itu dirobohkan.

Sekian dahulu, kalau perlu kepada keterangan-keterangan kami *In shā' Allāh* akan memberikannya lagi dan sekiranya ada hujah-hujah yang mempunyai alasan yang kuat atas membina masjid selain daripada jalan taqwa, kalau ada, kami bersedia akan rujuk.

Tujuan Pendidikan

sambungan dari muka 11

2. Bangsa Mesir zaman Fir'aun:

Pendidikan di negeri Mesir zaman dahulu kala terkandung dua perkara: dunia dan akhirat. Berkenaan dengan kehidupan dunia termasuklah pelajaran-pelajaran di dalam bermacam-macam pelajaran yang menjamin hidup mereka lagi pula diredayai. Dan yang bersangkutan paut dengan agama ialah melakukan amal ibadah supaya dikasihi oleh Tuhan pada hari akhirat.

3. Bangsa Greek:

Tujuan pendidikan di Greek ialah: menyediakan seseorang itu supaya sampai ke tingkat yang sempurna. Maka termasuklah di dalamnya: berkuasa menahan diri,

sederhana dalam pembawaan, seimbang di antara kekuatan jasmani dan rohani serta akal fikiran, budi pekerti dan keelokan rupa paras, percakapan dan perbuatan.

4. Bangsa Jepun:

Tujuan pendidikan di negeri Jepun ialah: mengeluarkan pegawai-pegawai kerajaan yang jujur terhadap negara dengan jalan diberi pendidikan semangat kepada mereka supaya berguna terhadap negara dengan pelajaran-pelajaran itu. Perguruan-perguruan, perusahaan-perusahaan dan susunan hidup umat Jepun menuju ke arah tujuan itu. Iaitu tujuan kebesaran negara.

5. Mazhab Katolik

Tujuan pendidikan mazhab ini ialah: mematikan syahwat, mencuaikan hak tubuh badan. Dengan demikian terpeliharalah roh serta terlepaslah dari azab neraka jahanam. Jalan ke arah itu: kesucian, kemiskinan dan taat. Ini berlaku kira-kira dalam kurun pertengahan.

6. Fascist

Iaitu sebuah kerajaan yang bercorak diktator bertujuan menyediakan anak-anak masyarakat yang cergas terhadap negara. Pekerjaan dan perusahaannya adalah untuk negara. Ini berlaku di dalam perang yang baru lalu.

7. Islam

Tujuan pendidikan dalam agama Islam ialah: Sebagaimana tersebut dalam sepotong ayat *al-Qur'an*: *wa 'btaghī fīmā ātāka Allāhu al-dāra al-ākhirata wa lā tansa naṣībaka mina al-dunyā*.² Yang bererti: "Carilah pada apa yang Allah telah berikan kepada engkau akan negara akhirat, dan janganlah sekali-kali engkau lupa terhadap nasibmu di dunia ini." Ini bererti menuju keredaan Tuhan dengan tidak melupakan dunia.

² Surah al-Qasas 28:77